

Prome dia di HCCA

Diferente presentacion interesante a wordo trata

ORANJESTAD – Den presencia di Su Excelencia Gobernador Interino Sra. Ella Tromp-Yarzagaray, a tuma luga dialuna mainta apertura di e prome 'Health Care Conference Aruba' (HCCA) den sala di Renaissance Convention Center. E mainta tabata uno cu a impresionar local y bishitantenan den publico pa su bon organizacion y programa y contenido presenta pa e oradornan invita.

Un di e puntonan cu mas a resalta di e prome mainta di conferencia tabata presentacion di dr. Joycelyn Elders, ex Ciruhano General di Merca. El a dirigi su mes den un lenguahe simpel y yena di carisma loke a percura cu e mensahe a yega na e publico.

E programa pa e prome dia di e conferencia tabata dirigi pa Rector di Universidad di Aruba, dr. mr. Glenn Thode. Ministernan di Salud Publico di Aruba, Corsou y Hulanda a hiba palabra resaltando e importancia di e evento y cua ta e areanan cu ta bay traha riba dje.

E sala tabata uno yen y atento na e ponencianan treci dilanti y por a mira un variedad di especialidad for di e sector medico, representante di instancianan publico y priva y tambe representantenan di pueblo den Parlamento.

Parti atardi tabata enfoca riba un serie di sesion di apertura



caminda participantenan por a elabora, analisa, haci pregunta y debati ponencianan riba e informacion cu nan a

ricibi durante e mainta for di oradornan.

Ta durante e sesionnan aki, cu ta ripiti na final di cada dia,

e participantenan tin oportunidad di haya sugerencia cu ta aplica especificamente na e situacion di nan pais.

'Sistema di Cuido di Salud den Comunitadnan Chikito' tabata e topico di e prome dia y e exponentenan invita tabata dr. James Fitzgerald como Director di Sistema y Servicionan di Salud pa PAHO/WHO, dr. Joycelyn Elders, Ciruhano General di Merca durante presidencia di William Jefferson (Bill) Clinton y e prome hende muhe y Afro - Americano pa ocupa e posicion aki y, por ultimo, dr. Shiyan Chao, Consehero di Banco Mundial.

Fitzgerald a papia riba 'Deseo versus. Recurso' den sistemanan di salud, mientras cu Dr. Elders a duna un bista amplio mencionando e reto, strategia y parametronan pa sistemanan den comunitadnan chikito. Por ultimo dr. Chao a presenta otro paradox di e sector comparando 'Mercado Habri' versus 'Mercado Controla'.

Prome dia di e conferencia a conclui atardi cu firmamento di un acuerdo Ministerial entre Hulanda, Corsou y Aruba riba tereno di regulacion internacional di Salud.

E di dos dia di HCCA ta habri diamars mainta cu e tema 'For di Cuido Medico Dirigi riba Produccion pa Dirigi riba Calidad' dirigi pa dr. Ashley Duits y cu otro tres orador invita treciendo informacion interesante. □



Un proyecto unico pa nos centro di ciudad

Historia di Paardenbaai conta pa ocho cabay perdi den Oranjestad

Na november 2014 e artista Osaira Muyale a presenta na Minister Otmar Oduber e fantasia di cabay pa decora e paisahe di nos centro di ciudad. E artista ta hopi gradici na Minister Oduber pa a acepta e proyecto aki. "E ta un proyecto hopi bunita pa Aruba henter." Sra. Muyale ta splica.

Ta trata di 8 cabay ubica den espacio publico cu ta representa e historia di Paardenbaai den siglo 16. E ta reflecciona e importancia cu Aruba tabatin promedio di e negoshi cu tabata tuma luga na Paardenbaai, cu a pone Aruba riba mapa e tempo ey caba. Cada un cabay cu su propio caracter y cu un nomber. Aruba tabata ricibi barconan for di islanan den Caribe, tambe

barconan di Latino America, pero tambe di Hulanda, Inglaterra, Portugal y te hasta Spaña.

E cabaynan ta reflecciona e conexion cu nos isla tabatin for di e tempo ey caba y cu nos tin ainda cu mundo henter. A traves di e cabaynan aki cultura y historia ta uni. E

ta bira un pieza di discusion unda visualmente ta corda nos storia y nos por comparti tambe cu otro nan.

Pa e arte aki a scoge e material di fiber, cual ta ideal pa nos clima y mirando tambe cu Aruba siendo un isla rondona pa lama, tin un averahe halto di salo den nos aire. E ta un material duradero. A scoge e tono blauw pa reflecciona e hecho cu e cabaynan aki a sali for di e awanan di Paardenbaai. Cada uno ta marca cu un simbolo cu ta conta visualmente nan historia.

Na final di juni cada un cabay lo keda instala na diferente luga den nos centro di ciudad. Minister Oduber a sigura cu arte den area publico no ta limita na e proyecto aki so. Lo tin mas na caminda. □



Historia di Paardenbaai reflecciona den arte

Cultura y Historia ta haya nan posicion den infraestructura di nos centro di ciudad

Den e maneho cultural di nos pais, Minister Otmar Oduber kier a inclui mas arte den areanan publico. Un idea cu a sali for di e Cumbre Cultural Nacional.

For di aña pasa a inicia cu e proyecto Paardenbaai y awor ta yegando su etapa culminante. E proyecto ta reflecciona e historia di Paardenbaai cual ta conoci pa tabata centro di ne-

goshi. Historia ta reflecciona cu tabata netamente den e lama aki cu cabaynan tabata wordo benta for di barco y nan mes- ter a landa pa yega tera.

Minister Oduber ta comenta cu ta di aki e fantasia ta sali cu e cabaynan ta sali for di e awa cu color blauw y ta perde den nos centro di ciudad. Pa fin di juni e intencion ta pa nos mira algun cabay na diferente ubicacion den nos centro di

ciudad, cada cabay cu su spli- cacion pa trece un tiki mas di nos historia. Un creacion di e artista conoci Osaira Muyale.

Esaki ta un di e prome proyectonan cu ta den pleno ehecucion bou di e capa di arte publico. Ta sigui cu uno na San Nicolas tambe cu ta un proyecto di domino. "Nos tur conoce San Nicolas den su epocanan y te dia di awe, domino tin un influen-

cia hopi grandi riba e bida di tur dia." Minister Oduber ta comenta.

Pa e proyecto di parti pariba di nos isla a scoge e artista Ryan Oduber. Tambe lo deco- ra henter e area unda antes tabata promenade cu dife- rente artistanan. Un Proyecto yama Murals caminda dife- rente pintornan riba nos isla combina cu muchanan ta bay pone un toke special den e

area di San Nicolas pa lo cual ta trata atraccionnan turistico. Ambos proyecto ta un com- binacion financia pa Aruba Tourism Authority y Mondriaan Fonds di Hulanda. Arte den area publico no ta limita na e dos nan aki so. Minister Otmar Oduber ta comenta cu tin mas proyecto den preparacion pa decora e paisahe di Aruba cu lo cual ta nos historia y nos custumbenan. □